

Ẹkwo
 Jiowẹlu
 Onye Mpfuchiru Chileke

¹ Ọwaa bụ ozi, Chipfu ziru Jiowẹlu, bụ nwa Petuwẹlu.

Igube, byaru mkpu-danyi-ọku

² Unu nụmakwa iphe-a;
 unubẹ ndu bụ ọgerenya!

Unu ngabekwa nchi; iphe,
 bukpuo ndu bu l'ali-a
 l'ophu!

Iphe, du egube-a;
 ?o mejekpọoru eshinu
 unu shi nọduta ndu?
 Tọo ?o mejeru lẹ teke kẹ nna
 unu oche phe?

³ Unu pfukwaaru iya
 unwegirima unu!

G'unwu unu pfukwaru iya
 pho unwu nkephe.
 Unwu nkephe epfuaru iya
 ogbo ophu abya nu.

⁴ L'iphe, otsu-gbiigbiigbi
 igube taru taphodo
 be oke-igube wubataru
 bya ataa.

Ophu oke-igube taru
 taphodo be
 unwu ogbolanu igube
 wubataru bya ataa.

Ọphu ụnwu ọgbolanu igube
taphodoru
bẹ mgbagbaramatsụ byaru
bya atachafu.

⁵ Unu tehu etehu;
unubẹ ndu angunukaje
mẹe.
Unu wata ara ẹkwa!

Unu chia mkpu;
unubẹ ndu anguje mẹe
ngugharu iya ẹka!

Unu kpọo mkpu mẹe
ọphúú ono;
kele a nyichatawaru
iya unu l'ọnu!

⁶ Ọ duru ọha, byaru bya
eripyabẹ alì mu-a.

Ndu ono bẹ ọkpehu dọ shii;
tẹme ọphu aagutadu
phẹ l'ọgu.

Eze, dọ phẹ l'ọnu dọ gẹ
k'oduma;
mbụ l'ọ dọ g'ẹpyii,
nọ l'ọnu ne oduma.

⁷ Ọ tapyashichawaru vayinu mu;
bya emee oshi figu mu;
ọ bukotaru ọla-l'iswi.

Ọ swachacharu iya ụgbo
woru iya tọgbo.

Ẹkali iya nọdu achagbaa
ụcha.

⁸ Unu gụa aphụ gẹ nwamgbọko,
yẹe nwoke teke akwaswee,
yeru uwe-aphụ,

agụ aphụ kẹ ọnwu
gburu nwoke eje
iya alulu.

⁹ Ngwẹja-nri; waa ngwẹja-mẹe
chihuwaru l'ulo Chipfu.

Ndu bụ uke nọ l'aphụ;
mbụ ndu ono,
ejeru Chipfu ozi ono.

¹⁰ Opfu, a kọru akọko bẹ bụwaa
Ọla-l'iswi.

Alị kpọhu nkụ; ereshi,
a kuru iya mebyishihu.

Mẹe òphúú tashihu; tẹme manu
nọdu atahụwa atahụ.

¹¹ “G'iphere gudekwa unubẹ
ndu akọ opfu!

Unu rashia ekwa ike;
unubẹ ndu akọ
opfu-vayinu!

Unu gụa aphụ witi unu;
yẹe balị unu; kẹle iphe,
a kuru l'opfu bẹ e
mebyishiwaru.

¹² Ome vayinu kpọshihuwaru nkụ;
tẹme oshi figu
nwukotawaa lwaa.

Oshi itorokuma; yẹe mpfu;
waa oshi udara;
mẹwaro iphe,
bukpoo oshi,
nọkota l'ẹgu l'ophu
kpọhukotawaru nkụ;
kẹle iphe, emeje g'ẹhu

tsɔo ɔnwu-eliphe
 ɔtso chiɥuwaru.”

Oku izimanu alwa azu

¹³ Unu yekwaa uwe-aphu wata
 agu aphu;

unube ndu bu uke!

Unu watakwa echi mkpu;

unube ndu ono,

anɔduje eje ozi

l'oru-ngweja ono!

Unube ndu ono, no l'iphu

Chileke mu eje ozi

ono;

unu byakwa eyee

uwe-aphu

nokota enyashi l'ophu;

kele ngweja-nri yee

ngweja-me be e

buchiwaru

l'ulo Chileke unu.

¹⁴ Unu raa ya arara g'a swiaru

Chileke egi!

Unu tu nduko, a-duru

Chileke iche!

Unu kua ndu bu ogerenya

nduko; mekpoo iphe,

bu ndu bu l'ali-a l'ophu;

g'ephe dzuko l'ulo Chipfu,

bu Chileke unu raku

Chipfu ono l'ekwa.

¹⁵ Ha-o! Egube mboku ono;

kele eswe Chipfu dukwaa

ntse.

Oo-buru eswe,

Ọkalibe-kangokọtaru-nụ
e-mebyishi iphemiphe.

16 “?Tọbodu l'iphu anyi gẹdegede
bẹ e meru; nri chihu;
bya emee;
ẹhu-utso yẹe ete ẹswa
bvukwapho l'ulo
Chileke anyi?

17 Akpuru iphe, a kuru akuku
gbapyashihuchawaru
l'ime igbo, a kuru iya.

Iphe, bukota ulo,
aakubeje nri
dabyikọtaru iphoro.

Ọba ereshi tuko dakashihu;
kẹle ereshi obu l'onwiya
mebyishihuru l'egu.

18 Lewarọ g'anụ-ulo atsugbaa ude!
Eswi bẹ ọ tųgbaru ẹberebete;
kẹle ẹphe te enwedu nri,
ẹphe a-ta;
mbụ l'aturu tųkoru eje
iphe-ẹhuka.

19 Ọ kwa gube Chipfu bẹ mu
araku;
kẹle ọku tsuakwaru ẹka
iphe-edobe atajẹ nri,
dụ l'echiegu;
mbụ l'iphe, bụ oshi,
dụ l'ẹgbudu nwukọtawaru
phuruphuru nwufu
l'ọku;

20 anụ-ẹgbudu nọdu atuchaa

hẹehee agba achọ ngu.
 Nggele nggele bẹ mini
 tashihuwaru.
 Tẹme ọku tsufuwaa ẹka
 iphe-edobe atajẹ nri,
 ẹdu l'echiẹgu.”

2

Igube, etsu gbiigbiigbi

¹ Unu gbua opu-ọgu l'úbvú
 Zayọnu!

Unu echia mkpu-ọgu l'úbvú
 mu ono, ẹdu nsọ ono!

G'iphe, bukpuo ndu bu
 l'alì-a nmakwaa
 pyaapyaapya;
 kẹle eswe kẹ Chipfu
 abyaakwaa;
 mbụ l'o rwuakwaru
 erwurwu;

² mbụ mbọku,
 a-bụru mbọku,
 agba ọchii agba kẹ
 tsukiribaa; mbọku,
 urwukpu a-sọpyabe;
 ẹkameka ejihu hụduu.

Ikpoto ndu ojọgu,
 ike ẹdu awụ gbiigbiigbi
 asọ abya g'ẹka ọchii
 nchi-abọhu asọpyabe
 asọpyabe l'eli eze úbvú;
 ẹdu iya ọphu eteke
 adụ-swe teke ndiche;

ọp̄hu ọ byadu adu
l'ogbo ọp̄hu abya nu.

³ Ọku nọ phẹ l'uzo iphu
ekepyashi iphe
ekepyashi.

Ọku nọdukwa phẹ phọ l'azu
enwu phoophoophoo.
L'iphu phẹ bẹ alì dọepho gẹ
mgbabu Édenu.

Èka ẹphe ghawarụ ye l'azu
buru echiẹgu,
dabyiru kẹ mmanụ;
ọp̄hu ọ dudu iphe,
anahuje phẹ nu.

⁴ Ẹphe gbaru ụgbugba g'inya.
Tẹme ẹphe nọdu awu kẹ
wugelengu wugelengu
g'inya-ọgu.

⁵ Igiji, ẹphe ede gude awu
gbiigbiigbi l'eli úbvú
eje abya dọepho
g'ẹka ụgbo-inya awu.

Mbụ l'ẹphe dọepho g'ẹka ọku
alwa wọwoowoo
etsu ekperema ọkponku;
g'ikpoto ndu ojọgu,
a chikoberu gude
eje ọgu.

⁶ Ọha, humaru phẹ nu evujeru
uzo rwushihi.

Iphu adukota onyemonye ẹji.

⁷ Ẹphe abyajẹ ẹnari g'ojọgu,
ike du.

Ẹphe nọdu enyije igbulọ gẹ
ndu ojọgu.

G'ẹphe ha nọdu egbuje giriri
azọ eje;
ọphu ọ dudu onye ọphu
egbeje egbegbe l'uzo,
ẹphe eshi;
⁸ ọphu ọ dudu onye ọphu
akwajẹ nwibe iya nkù.

Onyemonye apfujeeerupho
kẹkerekere azọ eje l'iphu
l'iphu.

Ẹphe anọdujeeepho apfu
shọoshoo apfuda
l'iphu ọgu.

Ọphu ẹphe aladu azu azu.

⁹ Ẹphe nọdu ezehuje zeba lẹ
mkpukpu;
tuko igbulọ gbaa gorogoro;
nyichaa enyinyi nyibachaa
l'ime ọlo l'ime ọlo.

Ẹphe nọdu eshijechaa windo
abahụ l'ọlo gẹ ndu-oshi.

¹⁰ “Eliphe l'ophu anmakọta
jiiijiii l'iphu phẹ.

Akpaminigwe nọdu anma
yigayiga.

Ẹnyanwu yẹe ọnwa gbahụ
ọchii.

Ọphu kpokpode ekeẹdu
paapaapa.

¹¹ Chipfu nọdu l'iphu ndu
ojọgu iya ede ririri.

Ndu alwuru iya ọgu bu aguta
aguta.

Teme ndu ono, emeje iphe,
o suru g'e mee ono
paa okpehu.

Mboku ke Chipfu pakwaru
eka bya adu ebvu.

?Bu onye a-du ike tapyabe
iya le nshi?"

Alaja Okpoma haa uwe

¹² Wakwa iphe, Chipfu epfu
baa:

Ntaakponu; unu gudenu
okpoma unu g'o ha
lwapfuta mu!

Unu gude aswi egu;
me ara ekwa;
me agu aphu gude lwa!

¹³ Unu lajaa okpoma unu;
o to budu alaja uwe!

Unu lwapfuta Chipfu,
bu Chileke unu;
kele oomeje eze-iphe-oma;
teme o nodu aphuje
obu-imemini!

Ehu te eghujedu iya egu
egwegwa;
teme n-yemobu iya du shii.

Teme ophu oohejedu iya ihee
eme ge nemadzu jee
iphe-ehuka.

¹⁴ ?A maru ?l'oo-ghakobe phuru
unu obu-imemini

meeru unu iphe-oma;
 mbu nu unu nri;
 waa me;e;
 k'ophu bu l'unu e-gude iya
 gweeru Chipfu,
 bu Chileke unu ngweja-nri;
 waa ngweja-me.

15 “Unu gbua opu-ogu obu
 l'ubvu Zayonu!

Unu raa ya arara g'a swiaru
 Chileke egu, du nsu!

Unu tu ndzuku,
 a-duru Chileke iche.

16 Unu chikobe ndu Izuru
 l'eka lanu!

Unu emee ge ndu byaru
 ndzuku ono du nsu!

Unu chikobe ndu bu
 ogerenya!

Unu achikobe unwegirima;
 me ndu ophu
 eechekwadu era!

G'onye luru nwanyi ophuu
 hakwaa erwu iya futu!

Nwanyi, aluru k'ophuu ahaa
 ulo-epfu iya!

17 Ge ndu bu uke, bu ndu ejeru
 Chipfu ozi nodukwa raa ekwa
 le mgbaka nwulo,
 eeshije abahu l'eze-ulo Chipfu
 yele oru-ngweja.

G'ephe pfukwaa su:
 'Gube Chipfu;

phɛnaaru ndu nkengu
 obu-imemini!
 Be mekwa gɛ ndu ono,
 bu okiphe ngu ono buru
 iphe, ee-gude achi ɔchi!
 G'ɛphe ta abɔkwaru iphe,
 ɔhamoha e-gude agba
 mgbɔnu;
 kɛle-a; ?dɛnu g'o gude
 ndiphe je l'anɔdu
 epfuru ndu Ízurɛlu
 asɔje phe: ?Bu awe
 bɛ Chileke unu nɔ?" "

ɔnu, Chipfu e-ye

- ¹⁸ Noo teke Chipfu a-wata eko
 okophoo l'ɛhu ndu ali ono,
 bu ndu nkiya ono;
 bya aphɛaru ndibe iya
 obu-imemini.
- ¹⁹ Chipfu eyeeru ndu nkiya ono
 ɔnu sɔ phe-a:
 “Unu lekwa-a; mu anɔakwa
 unu ereshi; yɛe mɛe ɔphúú;
 yɛe manɔ olivu;
 nɔkpoo ya unu shii;
 k'ɔphu oo-ji unu
 ɛpho rengurengu.
 Mu tee mebaɛdu unu g'unu
 buru iphe,
 ɔhamoha e-gude
 achi ɔchi.
- ²⁰ Mu a-chi ndu ojɔgu ono,
 shi l'ɔzo isheli ono

chì-mihu g'ẹphe nọdu
unu ụzenya.

Mu a-chìru phẹ jeye lẹ
mkpọkoro alì,
adudu iphe, b
eemetajẹ iya.

Ọgbo ivuzo ọgu phẹ bẹ
mu a-chìru ye
l'eze-ẹnyimu ụzo
ẹnyanwu-awawa.

Mu achìru ndu ikpazụ ọgu
phẹ ye l'eze-ẹnyimu
ụzo ẹnyanwu-arìba.

Ẹwó, ẹphe a-nọdu ekpo
etsulihuẹpho etsulihu.

Mbụ l'ishishi phẹ a-tụkoephọ
ẹkameka.

Ire-lanụ, bụ lẹ Chipfu
mewaru iphe,
parụ ẹka.

²¹ Gẹ ndzụ ba agushi ngu
gube alì!

Ọ chia g'ẹhu tsọo ngu uto;
g'i techia ẹswa!

Ire-lanụ bụ lẹ Chipfu mewaru
iphe, parụ ẹka.

²² Gẹ ndzụ ta agushi unubẹ anụ,
bu l'ime ẹgbudu;
kele ẹka unu atajẹ nri,
dụ l'echiẹgu abyawaa
erwu irwu.

Oshi abyawaa amị mebyi.

Oshi figu yẹe vayinu
abyawaa eme ike phẹ.

- 23 G'ẹhu tsoje unu uto;
 unube unwu Zayonu!
 Unu nodu l'eka Chipfu,
 bu Chileke unu tee eswa;
 kele o watawaru edzeru
 unu mini ishi-apha
 ono g'o gbaru.
 O watawaru edzeru unu mini
 ono edzeshi iya ike;
 edzeru unu mini
 ishi-apha
 bya edzekwapho mini
 ula-apha;
 g'o shi edzejehawaru
 iya unu.
- 24 Eka eechije balì bẹ balì
 e-mechaa ji ejiji.
 Eka aakuje mee eji kudumu
 le mee ophuu;
 yee manu olivu.
- 25 Mu a-pfu unu ugwo iya
 k'apha g'apha pho,
 igube tapyashiru iphe
 unu pho;
 mbu unwu ogbolanu igube;
 me mgbagbaramatsu
 iya; mekpoo
 otsu-gbiigbiigbi iya;
 mbu ojogu mu,
 ike du ono,
 mu yeru unu ono.
- 26 Unu e-nwekpooru ikpoto
 iphe, unu a-nodu eri

jasu l'ooji unu.
 Teme ɔ buru mbɛdua,
 bu Chipfu,
 bu Chileke unu be unu
 a-nɔdu etu epha;
 mbu onye ono, meru iphe,
 du biribiri l'ehu unu ono.

Su-a; ndu ono, bu nkemu
 ono;
 be e tee mebaekwa
 iphe-iphere.

²⁷ Noo teke unu a-maru le
 mu nɔ-a le Izurelu;
 maru l'oo mu bu
 Chipfu bya aburu
 Chileke unu;
 l'ɔ tɔ duedu onye ɔzo,
 dubaa nu.

Qphu a byadu emebaa ndu
 bu ndibe mu
 iphe-iphere ɔzo.

Ewe ke Chipfu

²⁸ E -mechaa be mu a-wu Unme
 mu l'ehu nemadzɔ
 mgburugburu.

Unwu unu unwoke me ke
 nwanyi e-pfuchiru
 Chileke.

Ndu bu ɔgerenya unu
 arwɔo nrwɔ.

Unwokorobya unu
 aphua ɔphulanya.

²⁹ Le mboku ono be mu a-wu
 Unme mu ono

l'ẹhu ndu bu ohu;
unwoke phe m'unwanyi
phe.

³⁰ Mu e-goshi iphe-ohumalenya
l'akpaminigwe me
l'eliphe l'ophu.

O buru iphe, mu e-gude mee
ya bu mee; yele oku;
ye okpu-tutuutuu
enwuru-oku.

³¹ Enyanwu be ee-me g'o
gbaahaa ochii.

L'e mee g'onwa buru mee.
Teme l'o rwua oke mboku ke
Chipfu ono,
bu eswe, a-du ebvu onoya.

³² Mbụ l'aa-dzota iphe,
bukpoo ndu araku epha
Chipfu;
kele oo-nweru ndu a-nahu
nu, a-nodu l'ubvu
Zayonu yefua le
mkpukpu Jierusalemu;
mbu l'oo-nweru ndu
Chipfu e-ku l'echilabo
nwa ndu ono,
waru nu ono;
bu iya bu iphe,
Chipfu pfuru.”

3

Ikpe, ee-kpe ohamoha

¹ “Kele-a; o -rwuepho le

mbọku ono,
 bụ teke mu e-dophu ndu
 Jiuda ẹphe lẹ ndu
 Jierúsalem mu azu
 l'ọnodu phẹ;
² bẹ mu a-chikobe ọhamoha
 tuko g'ẹphe ha chita
 jeshia lẹ nsuda
 Jiehoshafatu.

Noo ẹka mu a-nọdu kpee phẹ
 ikpe;
 ikpe ẹhu ndu ono,
 bụ okiphe mu ono;
 mbụ ndibe mu,
 bụ ndu Ízurẹlu;
 kẹle ẹphe chikaru ndibe
 mu; ẹphe dzuru
 ọhamoha;
 bya eworu alị mu kekashia.

³ Ẹphe tọaru ndibe mu
 ono ido;
 bya achita unwu phẹ
 unwu-okoro
 gude je agbanweta
 unwanyi-ụkpara;
 bya achita unwu phẹ
 unwumboko reshia
 gude gaa mẹe ngua.

⁴ “Sụ-a; ?bụ gụnu bẹ unu a-guru nụ mu; unubẹ
 ndu mkpụkpu Taya yẹe ndu mkpụkpu Sayidonu; mẹkpoo
 unubẹ ndu bukọta l'alị ndu Filisitayinu l'ophu? ?Bụ iphe,
 mu meru bẹ unu apfụ mu ụgwọ iya tọo? Ọ -bụru l'ọo
 ụgwọ bẹ unu apfụ mu bẹ mu e-kwo-a gburumu mee

ẹgwegwa woru iphe, unu meru tukobe unu l'ishi; ⁵ kele unu wotaru mkpọla-ọchaa mu; yẹe mkpọla-ododo mu bya atuko ẹku mu ndu ophu kachaa ama mma vuta je akube l'ulo nshi unu. ⁶ Unu woru ndu Jiuda yẹe ndu Jierusalẹmu ree ndu Gurisu g'ee-shi g'unu mee g'ẹphe nọdu ẹnya l'oke ali ẹka ẹphe shi.

⁷ “Lekwa; mu e-mechakwaa je achifuta phe l'eka ono, unu chiru phe je eree ono. Mu ewophutakwanu iphe, unu meru azu bya atukobe unu l'ishi. ⁸ Mu a-chita unwu unu unwoke me unwu unu unwanyi chiru reshia ndu Jiuda; ẹphe achita phe ree ndu Seba; mbu oha kwata dukpoo ẹnya okpobe adudu.” O kwa Chipfu be pfuru iphe ono.

⁹ Unu woru iphe-a pfuaru

ohamoha: Unu

kwakobekwa k'ogu!

Unu mekwaa ge ndu ike ogu

du tsulihu!

G'iphe, bukpuo ndu alwuje

ogu kpiritakwaru ntse

bya awata alwu ogu!

¹⁰ Unu kpukwaa ogu unu g'o

bugbaaru ogu-echi!

Unu akpu nwokarara unu

g'o buru arwa!

G'onye ike bvuru pfukwaa su:

“Mu bukwa onye

okpehu dushi ike!”

¹¹ Unu dzukobe ẹgwegwa;

unube ohamoha l'ophu!

Unu shikpo l'ekameka bya

edzukobe l'eka ono!

Gube Chipfu;

menaa gẹ ndibe ngu,
 bụ ndu ike dụ shi
 l'imigwe lwazeta l'alì!

- 12 “G'ọhamoha tsulihunu!
 G'ẹphe zenuru jeshia
 ẹ nsụda Jiehoshafatu;
 kẹle ọo l'ẹka ono bẹ mu
 a-nọdu kpee ọhamoha
 mgburugburu ikpe.
- 13 Unu watanu egbu mma unu
 swiiswiiswii; kẹle iphe,
 a kuru l'opfu chawaru.
 Unu bya azoshia akpuru
 vayinu obu;
 kẹle ẹka aakuje mẹe
 jiwaru.
- Nsukutu iya jiwaru ejiji;
 kẹle ẹjo-ememe,
 phe paru ẹka.”
- 14 “Igwe-ọha; igwe-ọha kuru ẹ
 nsụda,
 aanọduje pfua opfu pfukaha;
 kẹle mbọku kẹ Chipfu
 dukwaa ntse ẹ nsụda,
 aanọduje pfua opfu
 pfukaha.
- 15 Enyanwu yẹe ọnwa bẹ ee-me
 g'ọ gbaa ọchii.
 Ọphu kpokpode ekehẹdu
 paapaapa.
- 16 Chipfu a-gbẹ l'úbvú Zayonu
 sụa ekiri;
 nọdukwapfo ẹ

Jierúsalemu dee ririri.
 Eliphe yɛɛ akpaminigwe
 anmaa jiiijiii.
 Obenu lɛ Chipfu a-buru onye
 ndibe iya a-gbabeje lɛ
 mkpula je anɔdu
 zee ndzɔ.
 Mbɔ l'ɔo-buru ɔlo,
 a kpɔshiru ike doberu
 ɔnwu Ízurɛlu.”

Iphe-ɔma ndu kɛ Chileke

- ¹⁷ Noo teke unu a-maru l'ɔo
 mbɛdua bɔ Chipfu bya
 aburu Chileke unu;
 lɛ mu bu ebubu l'úbvú
 Zayɔnu; mbɔ úbvú ono,
 dɔru mu nsɔ ono.
 Noo teke Jierúsalemu a-du nsɔ;
 ɔphu ndu ɔhozo agbabaɛdu
 iya ophorokpo.
- ¹⁸ “O -rwua mbɔku ono bɛ
 úbvú úbvú a-nɔdu
 asɔshi mɛɛ ɔphúú.
 Eli obvu obvu asɔshi
 mini-ɛra-eswi.
 Mini atuko asɔshigbaa l'iphe,
 bɔkpoo nggele,
 dɔkota l'alì Jiuda.
 ɔgba-mini agbafuhu shi
 l'eze-ɔlo Chipfu wata asɔ
 gborogboro je agbaa
 mini lɛ nsɔda Shitimu.
- ¹⁹ Obenu l'alì ndu Ijiputu

a-buru ochobu.
 Alì ndu Edomu aburu
 echiẹgu,
 dabyiru kẹ mmanu.
 O buru iphe, a-kpa iya nu bu
 iwashi, ẹphe weru ndu
 Jiuda,
 bu ndu ẹphe no l'alì phe
 gbushia ndu adudu iphe,
 ẹphe meru.

²⁰ Obenu ẹ ndu Jiuda e-buru
 l'alì phe jasụ l'ojejoje.
 L'e buru ẹ Jierusalẹmu;
 e -shi l'ogbo sweru ogbo.

²¹ Noo teke mu a-guru phe nvu
 l'ikpe-ochi
 ọphu mu te eshidu
 guhawaru phe nvu
 iya.”

“Chipfu bu l'úbvú Zayonu!”

Bayıburu Izii
Izii: Bayıburu Izii Bible

copyright © 2014 Wycliffe Bible Translators, Inc.

Language: (Izii)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 30 Dec 2021 from source files dated 30 Dec 2021

c6885c7c-c550-5b8b-a4fe-4bd714af4f6d